

■ FORUM

Perspectivas electoralas

Igl è bun da demussar las perspectivas electoralas per il Grischun tar l'elecziun dal cussegl naziunal quest atun, era sche be nus vegls (mira LQ 24-06-15) faschain fin qua anc quai. Per mai vegn quai en tutta cas be en dumonda avant la fasa chauda dal cumbat electoral. Qua vegn ins forsa anc udids cun ils fatgs e cun ponderaziuns da princip areguard la democrazia ed il stadi da dretg.

Giusep Capaul fa ina analisa aritmetica correcta, e per aritmetica va i il davos er tar il proporz. Sia analisa seregn dentant avant la dumonda essenziala. Sche la pbd e la ps fan segirmain

mintgamai in mandat e quel dals verd-liberals va als liberals, e sch'i savess esser che la pps fa dus mandats, lu resti nagin pli per la pcd. Che quella vul far cun *Martin Candinas* in mandat cumplain è cler. Be, sa ella er cuntanscher quai? Cun admirar tschertas persunas d'ordaifer en scadin cas betg.

Perencunter ston ins vesair ch'il Grischun na consista betg be ord la Chemia da Domat e che sia – persunalmain tuttavia simpatica – directura e sia partida fan ina politica en fatgs d'avertura economica envers il mund per lur interess, dentant dal tutta fatg betg per autras branschas economicas

e cunzunt betg per il turissem sco la petga da nossa economia. Er zunt impurtants per il Grischun e sias minoritads èn ils dretgs umans e fundamentals e la separaziun da las pussanzas statalas che nies stadi democromatic da dretg garantescha. Tar quai s'auda – il cuntrari da quai che *Theo Candinas* critigescha en concordanza cun la pps – ual il declarar leschas sco nunvalaivlas e nunapplicablas sch'ellas cunterfan als dretgs numnads e garantids en nossa costituziun federala, entras nossas dretgiras ed il davos il tribunal federal. Quai è exact l'impurtanta funcziun da la terza pussanza e garantescha suletta-

main ils dretgs e las libertads da mintgina e mintgin da nus.

Grischunas e Grischuns fan bun da ponderar bain tge partidas che repschentan nus e defendan noss dretgs ed interess il meglier. Burgaisas e burgais ston er sedecider sch'els vulan sustegnair nossa politica da concordanza pli che necessaria en noss temp da crisa u sch'els vulan er far part da polemica senza respect envers auters umans – sco ella è sa mussada recentmain envers ils pli flaivels e smanatschads da la mort – enstagl da politica umana e sponsabla.

Giusep Nay, Valbella